

Díino Ayabyab Ñanraagofonjo

Díino ayabyab duniyaño buruhu ásiban amákilan ingi ímbenduk. Inini, Díino, horan gayabne bísibaño bímákilinno ingi ímbenduko? Bísibaño bímár ayabyab abónonjo ingi ñanraagofonjo. Anohum ayab abónonjo.

Jantenten gúloku Díino.

²⁴ Gucunkunom afak alób ayéj :

- Añantay ayik a réenjo abónonjo ;
Abónonku dígo, a kanaanjo ingi
h'abááhinahne a réenjo a biyaben
benen benen.

Ho Díino alóbne hómár ayikne.

²⁵ Nim Díino ayaborumne honjon
honjon h'ayikne, h'adékehne a réenjo,

a biyaben benjen benjen. Ayab
abónonku dígo, abónonku kanaŋaŋo
ingi h'abááhinahne a réeŋo. Bafégi
abónoŋo ámaránŋ ayéj ajónjoon.

(Jenes 1:24-25)

Angu, Díino ayabyab abónoŋo nip.
Abónonku kanaŋaŋo iniman abonkoŋo,
mudumoŋo, fákireŋo. Afak ayab abónonku
dígo iniman saahaŋo, fajaameneno,
ahayaŋo, jiheŋo. Afak ayab h'abááhinahne
a réeŋo iniman ñorooroŋo, jihaaloŋo,
junguluuroŋo ingi basumoolo.

Liibárhú Gúloku Díino ayéji mara Díino,
«Bafégi abónoŋo ámaránŋ ayéj ajónjoon.»
Abón noŋon noŋon gayabne ayéj ajónjoon.
Nip ajónne. Honj dasaaraŋ. A waato
nómár, yikireŋ banér b'alahah abónoŋo

iniman bakoofoorango b'abujohne saahango
ingi fajaamenengo. Yikireng ranniironjo
r'abujohne bákárango. A waato nómar
banéro yikirenger.

Faka, a waato nómar basumoolo gira
ankabumah, ahayango gira anlifimeh. Abón
nojon nojon ajéb, afak anaabo. Abón
nojon nojon no Díino ayabne ajóoniyeŋ nip
mara Díino fankánam ajónjoon.

Buruhu ásibaŋ amákilaŋ ingi ímbenduk ni
Díino aparer ñanraagofongo kantígo
k'anñantane anguy. Ayabur mintor hojon
hojon h'ensohálahoonuŋne. Bísibaŋ ingi
júuno k'ayaagund mintor. Munnojo
k'agoogen mintor. Bídimereno, japoño,
jakato, abónojo k'anfoolen mintor. Aparer
mintor hojon hojon h'ensohálahoonuŋne a

duniyaŋo. Díino apokunpokun mintor
ñanraagofonjo. Díino sohálaaraŋ honj.
Mintor gayaburne h'agune a duniyaŋo nip.

Angu, baparey nip, akir ayab
ñanraagofonjo. Alahlah ki ñanraagofonjo
dammíir ingi abónonjo.

Jantenteŋ Gúloku Díino.

²⁶ Afúrumi na, Díino afak alób ayéj :

- Inyabonj ñanraagofonjo k'ammíir
ingi mintor. Anguyhune
ñanlaameku jakato j'angune a
jakaamo, jatononjo j'angune a raafonjo
ingi abónonjo nip n'angune a réenjo.

²⁷ Angu Díino ayab ñanraagofonjo.
Bayabeeninj mees ammíir ingi ámar.
Ayabeeninjab k'ammíir ingi ámar

Díino. Udíigen ingi udikaam
gayabne. (Jenes 1:26-27)

Liibárhú Gúloku Díino ayéji mara Díino
« ayabeeninyab k'ammíir ingi ámar Díino. »
Kanda ñanraagofonjo, neeraŋ gammíirne
ingi Díino ? Hoge arinku uraagofonjo
ammímiir ingi arinku Díino ? Hoge Díino
ayikyik bigof, halah hanak ingi hádih hanak
k'adék ayab ñanraagofonjo maŋ nim,
k'anyik bigof, halah hanak ingi hádih hanak
k'ammíir ingi Díino ? Wówo, nim gireŋ !
Díino yikireŋ arin. Ámar háteer. Angu Díino
ayab uraagofonjo k'ayik háteer iniman ámar
Díino. Díino ayikyik jamméej. Angu, ayab
uraagofonjo k'ayik jamméejo iniman
jamméejhu Díino. Yabáranj jamméejhu
abóno k'ammíir ingi ámar, kanda ayab
jamméejhu uraagofonjo k'ammíir ingi ámar

Díino.

Ípápájul mara jamméejhu Díino asúsum dáde. Apápájul nip. Afañi jamméejhu uraagofonjo n'asúum dáde. Kanda haman nim, ayab jamaño k'anyik jamméej iniman ámár Díino.

Angu jamméejhu uraagofonjo, neerañ gammíirne ingi jamméejhu Díino ?
Uraagofonjo, apiren awosen. Apiren awosen n'añantane alód díkinem. Apiren ajóonin gúlááfulum. Apiren atéb, apiren afaañ, apiren alób. Ñanraagofonjo ampiren anlayay n'anñantane andoho honj.

Angu, Díino ayabyab jamméejhu uraagofonjo k'ammíir ingi anaanam. Faka, jamméejhu Díino arenrenn fet. Angu, ayab jamméejhu uraagofonjo k'arenn. Ayab

ñanraagofonjo k'anakaan hójoonino iniman
ámár Díino. Ñanraagofonjo inliiho mi Díino
ayabne, Adama ingi Awa, faliiho
jamméejenkinin arenrenn fet, hójoonino
bareñ gankaanahne.

Horan akanne ki Díino ayabi ñanraagofonjo
k'ammíir ingi ámár ? Akankaan nim ki
biñankayo ayik bájeginenku mintor ingi
ámár Díino. Asíibah k'alób ingi jamaño ki
jamaño annik anlób ingi ámár. Asíibah
k'apokuneeniñ ki immerenñ annik
ampokunom.

Hoge upiren ukaan biñankayo ingi
saahankan? Hoge gunoohonoo a dígo ingi
saahankan k'uruuhoh na warigaño ingi
saahankan k'uwoñahon? Woo, aji
lóbálaaro, dukaan nim ! Biñankayo dapiren

k'ayik bájeginenku mintor ingi saahaño
mara saahaño gira anwoseneh, gira
anlóboh, gira andohoh iniman mintor.
Kanda biñankayo apiren ayik bájeginenku fi
ingi ñanraagofonjo mara upiren úlob, upiren
uwooñ ingi jamaño. Úfegi, jamméejhen ingi
jamméejenku ñanraagofonjo ammímiir,
kanda jamméejhen ingi jamméejenku
abónonjo mídenen.

Angu Díino ayabyab ñanraagofonjo k'anyik
jamméejo n'ammíir ingi anaanam ki
biñankayo apiren ayik bájeginenku mintor
ingi ámár Díino. Marigeno, Díino afañi
mintor n'afuuh dáde. Kanda haman nim
ayab ñanraagofonjo ki jamméejenkinin
ammíir ingi jamméejhu ámár Díino ki
biñankayo apiren ayik bájeginenku mintor
ingi Díino.

Faliiho, Díino ayabyab údiigeeno, k'akir
ayab udikaamo. Inini, jantentenj Gúloku
Díino a gubaarhu ni Díino ayabne údiigeeno
uliiho a duniyaŋo.

Jantentenj Gúloku Díino.

⁷ Afúrumi na, Díino Umuyhintor
adooh didiiraŋo k'ayabum údiigeen.
Bayabem mees, afuurin a
ñankindenkinem ki údiigeeno apiren
anuumul k'ajéb. (Jenes 2:7)

Fo Díino Umuyhintor ayabne údiigeeno,
adooh didiiraŋo k'ayabumam hóbun. Kanda
bayabi mees, kanjébo yikirenj. Angu Díino
afuurin a ñankindenkinem k'anéerem
háteero. Bafuurin mees, údiigeeno ajéb
k'akeng.

Jantentenj Gúloku Díino.

⁴ Inini Díino ayaborumne raafo ingi réeñoínhondukínhonduk. ⁵ Waato nómar fo Díino Umuyhintor ayabne réeño ingi raafo, fam japoñ ingi munno waláranj maro fam Díino Umuyhintor ni fanti babúuñor kalubo a réeño. Agida a waato nómar yikireñer wúur m'alááfihineh réeño. ⁶ Haman nim réeño gageefegeef k'aheen abena.

⁷ Afúrumi na, Díino Umuyhintor adooh didiirango k'ayabum údiigeen. Bayabem mees, afuurin a ñankindenkinem ki údiigeenno apiren anuumul k'ajéb.

⁸ Agida Díino Umuyhintor n'akaan tool mees a didiirango d'aretuhne

Iden d'agune bi bísibaŋo
afúruntohone. Na ganinkne údiigeeno
m'ayabne. (Jenes 2:4-8)

Ni Díino apokunne Adama, ajóonindem a
duniyaŋo tool ajóoni k'aninkem na. A toolo
nómár ayikyik jafoola jasúumi ; hokepineŋo,
maanono, dítiro, ingi dinono dísuumi
iniman dimangiŋo, dídámelo, dimandarino
nip.

Aji újoonini toolo, hóge újooninkineh ba
búneku úduk ? Hóge úfegahaari wúur
m'ajóonind úduk tool k'ayéjem : « Upiren
udooh jafoolahu toolo nip. » Aji ukaani nim.
Aji újoonini toolo k'úneer wúur, uñantay
upokun wúuro úmár dáde.

Kanda Díino, nim gakanne. Ajóoninjoonin
tool ajóoni ba úduk. Úmár ingine Adama.

Adama gajóonindne toolo mara
apokunempokun dáde. Na ganinkne Adama
k'atopotor toolo. Asúumom a gubaarhu
h'ayikne na. Dohojo asúsum. Menihiren
mara a waato ámár japoño jajóndongo
yikirejer. Banéro b'apuñohne munngo
yikirejer. Tinngo t'ankábáhne maango
yikirejer. Faka, Adama gira arose toolo
nómár. Sohálaraŋ k'arose mara gucum
gucum dakombooro gaheenineheenin
didiiraŋo.

Jantenteŋ Gúloku Díino.

⁹ Díino Umuyhintor akaan ki
munngo awal na, biyaben bilabahi
munno m'ajóon búfeg mu bídimereno
asúum. Kanda a bájeginenku toolo
akankaan na munno munnak.

Bídimerenku síliho ganéerumehne
kanjébo. Síduko bídimerenkinem
ganéerumehne búpájulo hójoonino
ingi hójondoŋo. (Jenes 2:9)

A bájeginenku toolo, ayikyik na munno
munnak. Síliho garetuhne, sinoŋo
s'anéerumehne kanjébo. Gúloku Díino
lóburoŋ dáde a gubaarhu sinoŋo símár,
kanda ímpájuloŋ mara Adama, agi asíiba
k'ajéb bandór, añantay adóm bídimerenku
sinoŋo símár.

Díino afak arufun sinakinno. Gurethinem
sinoŋo s'anéerumehne búpájulo hójoonino
ingi hójondoŋo. Díino atengatenga Adama a
gubaarhu símár.

Jantenteŋ Gúloku Díino.

¹⁶⁻¹⁷ Waato ámar Díino atéekinteen
údiigeeno ayéjem :

- Upiren údom bídimerenku sino
sigurumaaren a toolo f'adék afalla
bídimerenku sino s'anéerumehne
búpájulo hójoonino ingi hójondoño.
Da údomhunekne bídimerenkinem
unirohunek. (Jenes 2:16-17)

Fo Díino aninkne Adama a toolo, atéekinem
h'añantane akaan ingi h'añantane abén.
Ayéjem: « Buku údom bídimerenku sino
s'anéerumehne búpájulo hójoonino ingi
hójondoño. » Díino ayikyik binaal ba
búteekinku Adama h'añantane akaan ingi
h'añantane abén mara Díino ayabemne.
Díino amuyemne. Faka apápájul h'ajónne
imbi Adama.

Mintor mees, Díino ayabne mintor. Angu, ayikyik binaal b'úpájul ba búteekinku mintor h'enñantahone inkaanon ingi h'enñantahone ímbenon. Díino ingine umuyhintor. Afak apájul h'ajónne imbi mintor.

Angu Díino atéekin Adama mara apiren adóm bídimerenku munnono a tooo f'adék afalla bídimerenku sinono ínsenduko. Ñantaaran adóm bídimerenku sinono s'anéerumehne búpájulo hójoonino ingi hójondono. Aji adómi bídimerenku símár, aniiruhneh.

Jantenteŋ Gúloku Díino.

¹⁸ Afúrumi na, Díino Umuyhintor
ayéjoora:

- Údiigeeno úmár, dajóon anooh
úmár úmánduk. Inini iyabákánam
úkááñin k'aguy ukokaykinem.

(Jenes 2:18)

Díino apápájul h'ajónne imbi Adama.
Apokunom. Asíiba ki duniyaño asúumom.
Angu alah k'ayaburam udikaam.

Jantenteŋ Gúloku Díino.

²¹ Angu Díino Umuyhintor akaan ki
údiigeeno adúuf f'ahuunin.
Bahuunini mees, Díino afac
basaalhánam k'afúnnor na gusaal
úngonduk. Bafúnnuri gusaalo gúmár
mees anjoyin akimben arinku
údiigeeno k'ajéb. ²² Díino guhuno
g'afúnnurne a basaalhu údiigeeno,
ingi gúmár gayabumne udikaamo.

Bayabem mees, adékirem imbi
údiigeeno.

(Jenes 2:21-22)

Angu, Díino adooh guhunku gusaalhu
Adama k'ayabum udikaamo. Udikaamo
uliiho a duniyaño. Úmár Díino ayabumne
ingi guhunku gusaalhu Adama. Gurethinem
Awa.

Díino ayab jamméejhu udikaamo k'ammíir
ingi ámár Díino ki biñankayo ayik
bájeginenku Awa ingi Díino. Faka ayabam
k'ammíir ingi Adama, ki biñankayo ayik
bájeginenku Awa ingi Adama k'anduhinay a
duniyaño.

Díino anéneer údiigeeno búuña ajóoni.
Anéerem udikaam. Asíiba ki Adama
atopátor udikaamo hóbun, udikaamo

m'anéeremne, k'apokunom abúuñaham.
Haanihu gub, Díino asíibáásiib ki údiigeeno
atopátor udikankánam k'apokunom
abúuñaham.

Jantentenj Gúloku Díino.

²³ Údiigeeno bafégi udikaamo ayéj :

- Iyoo úduk ummoonge m'ímiirminj.
Biyabenkint ímbenduk. Jahunkunom
a guhunkum gafúruntne. Aharhánam
a aharhum gafúruntne. Inini
irethinem « Udikaamo » maro imbi
údiigeeno gafúruntne.

Nim údiigeeno alóbne f'afégne
udikaamo. ²⁴ Gúmár akanne
údiigeeno dannoo hay ingi báábám
ingi nunom. Úmár adékhineh
k'ankokay ingi udikankánam ki

immeren inako anguy iniman
uraagof úmánduk.

(Jenes 2:23-24)

Díino akanne ki bajaho ayik a duniyaño.
Guyron karo wúur akanne. Bajaho ajónjoon
mara Díino akanne ki bajaho ayik. Bajaho
añantay ajóon aji inkaanon ni Díino ayéjne.
Damiñ ífekunon a Gúloku Díino ho Díino
alóbne a nintiku bajaho.

Angu, Adama ingi Awa anguy a toolo
ajóoninno no Díino ajóonindeeniñe.
Ayikyik biñankayo bájeginenku immeren
ingi Díino. Díino gandékaydekay ingi Adama
ingi Awa a toolo. Galóbolob ingi immeren ki
immeren anlóboh ingi Díino.

Ankontankontan dáde. Kanda ampájul
mara aji búuñaaraan ho Díino ayéjne, aji

andómi bídimerenku sinoŋo si Díino
adígumne, annirohuneŋ. Biñankayo
bájeginenku immerenŋ ingi Díino
alekaháneŋ. Anfúrhuneŋ a tooło k'anniıro.